



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Stephani Balvzii Miscellaneorum Liber ... Hoc est,
Collectio Veterum monumentorum, quæ hactenus
latuerant in varijs codicibus ac bibliothecis**

Baluze, Etienne

Parisiis, 1679

Ludovici IV. Bavari Imp. submissio facta Clementi VI. anno MCCCXLIV.

urn:nbn:de:hbz:466:1-14735

Datum Treveris die decima septima mensis Septembris anno Domini millesimo trecentesimo quadragesimo primo.

*LUDOVICI IV. BAVARII
Imperatoris submissio facta Clementi VI.
anno MCCCXLIV. die XVI. mensis Ianuarij per Humbertum Dalphinum Viennensem & alios ejusdem Ludovici Ambassiatores.*

Ann. 1344.

IN nomine Domini. Amen. Anno à nativitate ejusdem MCCCXLIII. Indictione XII. die XVI. mensis Ianuarij, pontificatus sanctissimi Patris & Domini Nostri Domini Clementis divina providente clementia Papæ sexti anno secundo, in Consistorio publico, in quo fuere præsentibus Reverendi Patres Domini miseratione divina, Petrus Penestrinus, Bertrandus Ostiensis, Gaucelinus Albanensis, Iohannes Portuensis, Annibaldus Tusulanus, Petrus Sabinensis Episcopi, Imbertus Tituli Basilicæ XII. Apostolorum, Talayrandus Tituli sancti Petri ad vincula, Petrus Tituli sancti Clementis, Gotius Tituli sanctæ Priscæ, Bertrandus Tituli sancti Marci, Bernardus Tituli sancti Cyriaci in Thermis, Guillelmus sanctorum Quatuor coronatorum, Guillelmus Tituli sancti Stephani in Cælio monte, Helias Tituli sancti Vitalis, Guido Tituli sanctæ Cæcilie, Stephanus Tituli sanctorum Iohannis & Pauli, Hugo Tituli sancti Laurentij in Damaso, Ademarus Tituli sanctæ Anastasie Presbyteri, ac Raymundus sanctæ Mariæ Novæ, Galhardus sanctæ Lucie, Iohannes sancti Angeli, Bertrandus sancti Eustachij, & Guillelmus

Helms sanctæ Mariæ in Cosmedin Diaconi Cardinales, præsentibus etiam venerabilibus Patribus fratre Petro Ierosolymitanensi & fratre Geraldo Antiocheni Patriarchis, ac Dominis Gasberto Narbonensi, Orchelyo Salzeburgensi Archiepiscopis, Iohanne Belvacensi, Petro Claromontensi, Stephano Cassinensi, Guillelmo Forojulensi, Raymundo Morinensi, Beltramino Bononiensi, Angelo Grossetano, Bernardo Oscensi, Guidone Tutelensi, fratre Petro Grassensi Episcopis, Gaffredo Lanfanensi, Nicolao Lemonicensi, Agapito Lunensi Electis, Bernardo Stephani, Raymundo de Valle, Guidone de Calma, & Francisco de Vrsinis Domini Papæ Notarijs, & discretis viris Dominis Guillelmo de Norvvico, Iohanne de Blandiaco, Amanevo de Mota, Bernardo de Novodompno, Petro Alamandi, Bernardo Hugonis de Cardalhalco Auditoribus sacri palatij apostolici, Guillelmo de Posterela, Petro Villaris, fratre Petro Basterij, Hugone de Arpajone, Iacobo de Placentia, Galhardo Nigri Domini Papæ Capellanis, Carlino de Madalbertis de Cremona, Blasio de Senis, Francisco de Lanceo, Henrico de Ast, Francisco de Aquila, Iacobo de Mediolano in Romana Curia Advocatis, ac Guillelmo de Bos, Iohanne de Amelio, Michaële Ricomanni, & Bertrando de Chiannaco Clericis Camerae dicti Domini nostri Papæ, & Notariis publicis infra scriptis, & alia Prælatorum & personarum ecclesiasticarum & secularium multitudine copiosa, personaliter constituti magnificus & potens vir Dominus Humbertus Dalphinus Viennensis, ac venerabiles viri Domini Marquardus de Randegg Iuris canonici Professor, Electus & Præpositus Bambergensis, Eberhardus de Tuminaroe Præpositus Augustensis Ecclesiarum, & Vlricus de Augusta Protonotarius, Ambassiatores, nuncij, & procu-

ratores magnifici viri Domini Ludovvici de Bavaria, qui se Regem Romanum nominat, facta per dictum Dominum Marquardum quadam propositione verbali, in qua multa mala & excessus, crimina & delicta, quæ commiserat idem Ludovvicus contra sanctam Romanam Ecclesiam tempore sanctæ memoriæ Domini Iohannis Papæ X X I I. in persona ipsius Domini Iohannis & contra unitatem & libertatem Ecclesiæ sacrosanctæ, & quasi omnia contenta in quodam procuratorio, de quo infra fit mentio, verbo narravit, vice & nomine ipsius Domini Ludovvici de Bavaria exhibuerunt & produxerunt quandam litteram, quam dicebant esse procuratorium dicti Ludovvici, scriptam & signatam, ut prima facie videbatur, manu & signo Ottonis Ameldorf de Vinezman Clerici Bambergensis diocesis & Romani Hormelin Clerici Constantiensis diocesis publicorum auctoritate sedis apostolicæ Notariorum, & sigillatam impendenti quodam sigillo rotundo in cera crocea, in quo in medio sculpta erat quædam imago hominis habentis infulam in capite suo, sedentis inter duas aquilas, habentis sub pedibus ejus duos leones, & tenentis in manu dextra quoddam sceptrum & in manu sinistra quoddam pomum rotundum, in cujus circumferentiæ hæ litteræ legentur: *Ludovicus quartus Dei gratia Romanorum Imperator semper augustus.* Et à tergo dicti sigilli erat quædam impressio alterius parvi sigilli, in qua erat sculpta quædam aquila, & in circumferentiâ ipsius ex litteræ legentur: *Iustè judicate filij hominum.* Quæ quidem littera de ipsius Domini nostri Papæ mandato ibidem publicè lecta fuit; ipsaque ex integro lecta, supranominati Ambassiatores, nuntij, & procuratores, habentes, ut dixerunt, inter cetera à dicto Domino Ludovico de Bavaria plenam & liberam potestatem & speciale manda-

tum, prout ex forma dicti procuratorij, cujus tenor describetur inferius, constare dixerunt, ponendi & submittendi dictum Dominum Ludovicum de Bavaria, res, statum, velle & nolle, nihil sibi propriij arbitrij retinendo, absolutè & liberaliter in manibus dicti Domini nostri Papæ, ejusque dispositioni & ordinationi ipsius Domini Ludovici de Bavaria personam, res, statum, velle & nolle, nihil sibi propriij arbitrij retinendo, pro malis & excessibus, delictis, & criminibus contra dictum Dominum Iohannem, Ecclesiam Romanam & etiam universalem commissis, & contra unitatem & libertatem ejusdem Ecclesiæ sacrosanctæ. Et pro emenda & satisfactione omnium præmissorum facienda eidem Ecclesiæ sacrosanctæ, prout habent, ut præfertur, à dicto Domino Ludovico in mandatis, ex deliberato proposito & spontanea voluntate, licèt per dictum Dominum nostrum Papam, facta prius aliquali collatione juxta exigentiam agendorum, semel & pluries dicti Ambassiatores, nuntij, & procuratores exhortati fuissent quòd in tanto negotio, priusquam facerent, viderent & deliberarent quid circa præmissa essent acturi & quòd nollent fictivè aliquid agere & verbis solùm dicere & non realiter, & facto quæ dicebant attendere, quia Deus, cujus vices tenet in terris Ecclesia, irrideri non potest, & quòd non crederent quòd ipse indiscretam remissionem faceret, licèt misericordiam non negaret, plena deliberatione iterum habita inter eos absolutè & liberaliter ipsum Dominum Ludovicum, scilicet personam, statum, res, & bona ipsius, posuerunt in manibus præfati Domini nostri Papæ, ipsumque & alia supradicta & ejus ordinationi & dispositioni pro omnibus supradictis excessibus & emenda & satisfactione fiendis pro eis & omnibus in littera procuratoria infra scripta contentis totaliter submiserunt.

Et ad prædictorum majoris roboris firmitatem supranominati Ambassiatores, nuntij, & procuratores, & ipsorum quilibet, juraverunt tactis sacrosanctis evangeliiis in animam ipsius Domini Ludovici prædicta omnia & singula posita, ut præfertur, & submissa attendere & complere & effectualiter observare quicquid dictus Dominus Noster super prædictis duxerit ordinandum, & non contra facere vel venire per se vel alium seu alios, directè vel indirectè, publicè vel occultè, aliqua ratione seu causa. Et ibidem dictus Dominus noster Papa, audita dictorum Ambassiatorum, nuntiorum, & procuratorum propositione & submissione, & aliis per ipsos dictis, factis, & juratis, humilique petitione & supplicatione ipsorum tam super expressatis superius quàm aliis in dicto procuratorio contentis, multarum animarum periculis, quæ propter dictum Dominum Ludovicum & perpetrata per eum sunt diversis pœnis & sententiis, involutæ, affectu paterno compatiens, hujusmodi positionem, submissionem personæ ipsius Domini Ludovici de Bavaria, rerum, status, abdicationem proprii arbitrij ipsius in se misericorditer & gratiosè recipiens, dixit & protestatus fuit quòd licèt quantum ad relaxationem processuum contra ipsum Dominum Ludovicum factorum, & pœnarum quas propter præmissa incurrerat, intenderet misericorditer agere cum eodem, quantum sibi cum honore Ecclesiæ videretur, indiscretam tamen remissionem facere nullatenus intendebat. De quibus omnibus & singulis dictus Dominus noster mandavit, & ipsi Ambassiatores, nuntij, & procuratores requisiverunt, per nos Notarios infrascriptos & nostrum quemlibet fieri unum, duo, & plura publica instrumenta. Actum &c.